

## Opening of the Doors

Տէրդ տերանց, Աստուածդ աստուածոց, որ զմերժեալ եւ զհեռացեալ ազգ մարդկան ժողովեցեր եւ եկեղեցացուցեր յօրինակ խորանին.

Եւ այժմ 'ի ձեռն Որդւոյ քոյ սիրելւոյ Տեառն մերոյ Յիսուսի Քրիստոսի շինեցաւ աղօթանոց տաճար անուանդ քում Սրբոյ, զոր հրամայեցեր շինել եւ առաքելական քարոզութեամբ ճշմարիտ հաւատոյ հիմնացուցանել զնա:

Վասն որոյ 'ի բոլոր սրտէ աղաչենք զքեզ Տէր, զանուանեալս տաճար ամենասուրբ անուանդ, ընկալցիս քեզ տուն 'ի բնակութիւն եւ եկեղեցիս այս լիցի քեզ 'ի հաճութիւն, զի սովաւ սրբեսցուք եւ քաւեսցուք 'ի մեղաց մերոց, մեք եւ ժողովուրդքս:

Եւ գոհանալով փառաւորեսցուք զՀայր եւ զՈրդի եւ զՍուրբ Հոգիդ յաւիտեանս յաւիտենից. ամէն:

✦ Խաղաղութիւն ամենեցուն:

Աստուծոյ երկիրպագեսցուք:

Աղաչենք զքեզ ողորմած եւ մարդասէր Աստուած ամենայն սրտիւք մերովք, խոնարհեցո՛ր զունկն քո յաղաչանս մեր. Ընկալ զխնդրուածս եւ զմաղթանս մեր որ առ քեզ եւ հանգո՛ զշնորհս Հոգւոյդ Սրբոյ 'ի տունս այս, զոր հաստատեցաք եւ շինեցաք յանուն քո:

Օրհնեա՛ եւ սրբեա՛ զքարինս եւ զփայտս որ 'ի սմա. Չի ամենայն որ որ ողջունեսցէ զսա եւ երկիրպագանիցէ սմա, մի՛ որպէս անսուրբ քարի եւ փայտի, այլ քեզ եւ անուանդ քում սրբոյ երկիրպագանել համարեսցի: Եւ բնակութեամբ շնորհաց Հոգւոյդ Սրբոյ որ 'ի սմա, լուցումն լուսոց եւ բուրումն անուշահոտ խնկոց եղիցին 'ի մատուցումն սուրբ Երրորդութեանդ Հօր եւ Որդւոյ եւ Հոգւոյն Սրբոյ, որում վայելեն փառք, պատիւ եւ երկրպագութիւն, այժմ եւ միշտ եւ յաւիտեանս յաւիտենից. ամէն:

## Consecration of the Church

Տէր ողորմեա, Տէր ողորմեա, Տէր ողորմեա:

Տէր Աստուած մեր որ հաստատեցեր զերկիր հաստատութեամբ իւրով եւ արարեր 'ի նմա զօրութիւնս բազումս: Դու, Տէր ամենայն երկրի, որ զօրացուցեր զեկեղեցի քո զայս եւ հրամայեցեր կանգնել 'ի նմա սեղան սրբութեան եւ մատուցանել զբանաւոր պատարագս եւ զանարիւն ողջակէզս յամենասուրբ անուն քո 'ի կենդանութիւն հաւատացելոցս. աղաչենք զքեզ, Տէր բարերար, առաքեա՛ զՀոգիդ քո Սուրբ, եւ սրբեա զսեղանս զայս զոլ յոյս եւ կենդանութիւն մեզ ամենեցուն որք կամք առաջի մեծի փառաց քոց 'ի նորոգումն հոգւոյ եւ 'ի հաճութիւն օրհնեալդ կամաց: որ միայնդ ես Աստուած ողորմած, երկայնամիտ եւ բազումողորմ, եւ փառաւորեալ է ամենասուրբ երրորդութիւնդ Հայր եւ Որդի եւ Սուրբ Հոգիդ, այժմ եւ միշտ եւ յաւիտեանս յաւիտենից. ամէն:

Տէր Աստուած մեր, որ ըստ անուան գլխաւոր առաքելոյն Պետրոսի վէմ անուանելոյ,

վեմ անուանեցեր զեկեղեցի քո սուրբ, ապա զտաճարս այս որ յանուն քո շինեցաւ, քո անբաւ զօրութեամբդ օրհնեա՛:

Եւ զոր հաստատեցեր 'ի սմա սեղան` սրբութիւն սրբութեանց արա, զի մատուցեալն 'ի սա յանարատ պատարագ, փոխեսցի յանապական եւ 'ի պատուական մարմին եւ արիւն միածնի քո Յիսուսի Քրիստոսի:

Եւ շնորհեա՛ զնոյն որոց մտանեն 'ի տաճարս եւ խոստովանին զմեղս իւրեանց, լինել քաւութիւն մեղաց եւ առողջութիւն հոգւոյ եւ մարմնոյ, բարեխօսութեամբ սուրբ Աստուածածնին եւ ամենայն սրբոց: Վասն զի օրհնեալ է անուն քո եւ փառաւորեալ անվախճան թագաւորութիւնդ Հօր եւ Որդւոյ եւ Հոգւոյն Սրբոյ, այժմ եւ միշտ եւ յաւիտեանս յաւիտենից. ամէն